

晚

晴

移

詩

匯

晚晴移詩匯卷十八目錄

屈大均 三十六首

陳恭尹 廿七首

杜濬 十九首

杜芥 六首

王猷定 八首

李世熊 七首

賀貽孫 四首

陳允衡 二首

魏闕 四首

余畚 三首

黃居石 四首

楊應麟 一首

郭勸 一首

郭嘉屏 一首

晚晴移詩匯卷十八

徐世昌

屈大均號翁山番禺人有道援堂集

詩話翁山少丁喪亂嘗逃於釋氏名今種字一靈又字騷餘晚乃返冠服詩自謫仙入念亂憂生盤鬱哀豔又以初遭鼎革每多故國之悲燕京述哀日陰雨煤山樹君臣各一枝內城吹角急前殿擊鐘遲西山口攢宮日血灑海棠中使見神歸天穴貴妃同真孤倉卒人難託微服艱難路不通述思陵末造事語至痛沈

過大梁作

浮雲無歸心黃河無安流神魚騰紫霧蒼鷹擊高秋類此雄豪士滔滔事遠游遠游亦何之驅馬登商邱朝與侯嬴飲暮爲朱亥留悲風起梁園白草鳴颼颼揮鞭控鳴鏑龍騎如星流超山逐羣獸穿雲落兩鶩歸來晏吹臺酣舞雙

吳鉤驚沙翳白日垂涕向神州徒懷匹夫諒未報百王讎  
紅顏漸欲變歲月空悠悠

與諸兄弟飲射作

鯉魚何盤盤瓠葉何幡幡弟兄相燕飲其樂如新昏戶庭  
無外侮絃歌有餘閒人生無幾何骨肉相好難兄友而弟  
恭所以承親歡親歡承不足張侯在中谷兄射中熊羆弟  
射中鴻鵠鴻鵠比其翼熊羆同其力

孤竹吟

我行逾萬里徬徨思故鄉黃鵠雖失所不從燕雀翔駕言  
登孤竹東北望邊疆驚沙如白雪殺氣爲嚴霜游子一何  
微落葉同颺颺獨智世不容接輿久徬狂神龍爲蛟蜃白  
刃莫能傷大義劫天下湯武誠不祥夷齊憂無臣叩馬空

慨慷白日何昭昭浮雲復茫茫吁嗟命之衰揮涕歸首陽

古意

妾有大秦珠嘗含明月姿明月虧有時妾珠光不移朝懸  
妝鏡臺暮繫紅羅衣君心不可照持此委沙泥願得青鸞  
鳥銜將贈宓妃

答陳宛平

與子結交初有如天上月三五光未滿已憂蟾兔闕浮雲  
不在多蔽虧在毫髮沐浴天河水金波期不沒君爲啟明  
東我爲長庚西與月相終始黽勉至晨雞

送從弟無極歸里

雲中有二老采薇何從容洞房隱青巖卉木交蒙龍處幽  
含聖神被我太古風我祖蹈雲天窈窕相追從離騷合經

術規諫心無窮子其玩微詞追琢爲楚風讒邪譬雲蜺君  
子喻虬龍金相而玉質驚采開童蒙

重華託神仙解體升九疑離宮若雲浮欲陟無天梯垂衣  
接萬靈棄我獨如遺煢煢在中野熊羆鳴相追弟兄貴急  
難骨肉無乖離子能禦外侮羈旅吾何悲今朝途路窮雙  
鳧忽分飛商飈吹白雲悵望徒沾衣

琵琶行贈蒲衣子

王郎好音能琵琶千愁萬恨歸邊沙明妃紫臺作胡語公  
主烏孫思漢家慷慨惟憑馬上樂淒涼豈必軍中笳新聲  
鼓出好詞曲三日一調勞紅牙古詞元人百雜劇新曲杜  
丹兼浣紗伯龍紅友供繁弄酒酣一唱三咨嗟改調高彈  
颯風雨攢點忽似更蝦蟆手搗口歌聲若一絲肉紛飄如

飛花小聲吹裂漆箏簫大聲操亂漁陽搥自矜琵琶與琴  
應眩精駭耳非淫哇一一暉音合清濁上腔下柱同整斜  
十指絕光若驚電雙袖奮影爭流霞亂擊空中白翎雀橫  
奔塞上拳毛騮毛血淋漓儘揮灑又如胡漢相紛拏大雷  
小雷響四迸天驚石破愁女媧兒女昵昵不得語恩怨爾  
汝潛相加緩調平絃有時倦掩抑奇態嫌空襲聯綿斷續  
轉嗚咽又如絃瑟悲匏巴一激一昂真當泣哀歌銷盡情  
萌芽鴟粒石槽兼鐵撥翻嫌古法多喧譁逢君但乞飛龍  
引發揚蹈厲除姦邪鎮西更作大道曲羅襦胡牀臨闔閭  
阮咸淒鏘竹林下風流豈似君瑯琊我今煩冤神越散大  
招須君爲景差不然節奏盡傳我十調五調成豪奢一枚  
昨致惠文婦槽用香楠連木瓜得曹左手裴右手亦可持

慰吾秦嘉琵琶弟子君多少中有幾人顏如茶楓香定移  
西樓女鞋帶可記楊家娃得君琵琶諸楔子輦婆舊譜甯  
足誇梳山音律此一種教坊買斷傾金車王郎王郎爾莫  
苦埋憂國腹如丹砂天際真人既有此北窗跂腳殊風華  
王不菴作卧龍松歌爲余壽詩以酬之

黃山山上多怪松半生石笋半芙蓉芙蓉石笋亦松變有  
一不變爲卧龍龍本無形以神化真形往往與松同龍之  
隱者但高卧人不見龍見髯翁髯翁鱗甲多怒決柯如蒼  
銅枝屈鐵引根十丈始作榦榦雖千年如萌蘖霹靂橫將  
偃蓋傾蛟螭爭向輪囷結夜光有火出空心日炙多膏流  
斷節一枝一榦一尺蠖求信且復依巖穴山僧寫圖貽我  
看玉子作歌含淒咽尺寸得空自盤攫縱橫穿土苦羈紲



栽栽千尺乃無勢幸因奇醜免摧折五蠶短短少波濤聲  
似風雷畜未泄苦心愛此一樹怪自少摩挲至大耋蹢躅  
尙有尊足存支離乃是鬼神設臃腫何須規矩中斧柯且  
喜薪蒸絕雖然久蟄非泥蟠撐出丹崖作遺子石破天驚  
自小時後凋憑爾存孤孽本是軒皇昔所種手術至今乍  
明滅當年且戰且學仙霜根留得元黃血灌溉頗用朱砂  
泉滋潤微疑太古雪浮邱無力治拘攣容成有意引寥泝  
黃山諸松此最古兒孫萬萬丹臺列卧者天淵自高深立  
者棟梁久顛蹶君指此松爲予壽意在不材能斲楚蠹蟻  
頻容蝕茯苓藤蘿一任爲瓜瓞松黃落地成古苔松子滿  
天低可綴君在黃山亦一松莫教化石存棺槨一松孤作  
老人峯秦漢來封久不屑卧龍復有擾龍好繚繞數峯出

巖嶠一松飛作天生橋一松倒生更奇譎煩君添作四松  
圖置我松間長用拙

秣陵

牛首開天闕龍岡抱帝宮六朝春草裏萬井落花中訪舊  
烏衣少聽歌玉樹空如何亡國恨盡在大江東

攝山秋夕作

秋林無靜樹葉落鳥頻驚一夜疑風雨不知山月生松門  
開積翠潭水入空明漸覺天雞曉披衣念遠征

雲州秋望

白草黃羊外空聞戍鼓哀遙尋蘇武廟不上李陵臺風助  
羣鷹擊雲隨萬馬來關前無數柳一夜落龍堆

太華作

仙掌三峯立天門半壁扃蓮花圍白帝玉井出明星橫度  
蒼龍磴高歌落雁亭河山襟帶盡兩戒據天經  
昨夜聞長笛依稀鸞鳳音三峯吹落月一半駐空林人道  
水簾裏玉姜時弄琴神仙不可接悵望白雲深

釣臺

富春山萬疊雪映釣臺青予若桐江月長隨溪客星寒猿  
吟石壁白鷺落沙汀漁父頻招手廻舟入杳冥

魯連臺

一笑無秦帝飄然向澠東誰能排大難不屑計奇功古戍  
三秋雁高臺萬木風從來天下士只在布衣中

自白下至構李與諸子約游山陰

最恨秦淮柳長條復短條秋風吹落葉一夜別南朝范蠡

湖邊客相將蕩畫橈言尋大禹穴直渡浙江湖

人日衡陽道中

人日雪霏霏孤舟上翠微帆隨南嶽轉雁背碧湘飛知己  
惟長劍還家復短衣猿聲如送客薄暮更依依

漢口

漢口清秋夜雲霞寒亦稀新潮隨月滿落葉帶螢飛白首  
難孤往青山欲早歸憑誰報慈母游子有寒衣

淮陰侯

淮陰當未遇一飯亦無才天欲王孫餓人慚漂母哀釣魚  
城下去帶劍市中來笑謂晨炊者英雄被爾催

艱難惟一飯天肯與王孫草昧多如此英雄不忍言漢興  
因婦女臣節在壺飧誰分宮前草離離是血痕

舟入新興江將訪柴子有作

不知江口水聲分  
舟入千巖只爲君  
春盡林香猶作瘴  
雨餘山氣未成雲  
白魚捕處禽多翠  
甘草銜時鹿有羣  
咫尺松杉煙靄隔  
一峯長嘯萬峯聞

春日曲

辛苦黃鶯汝聲聲  
爲別離盡將閨裏意  
啼與落花知

山陰作

秋霜一夜凋榆柳  
馬上征夫最早寒  
邊女不須歌入塞  
故鄉明月夢中看

秋夕黃陵作

秋夕江潭寐不成  
林空烏鵲亦多驚  
風吹不盡瀟湘葉  
散作天邊秋雨聲

客雁門作

三年作客傍滹沱聽盡哀笳出塞歌  
白髮不驚明鏡滿秋霜只怨雁門多

東趙子實

雙淚天山灑翠微生憎鴻雁入關飛  
望鄉空上昭君墓一片牛羊共夕暉

江上望南嶽

五峯雪作九江水廻雁晴連嶽麓  
雲未到朱陵仙洞口鐘聲已隔碧湘聞

放歌行爲潘子壽

丈夫五十髮未白痛飲狂歌真可惜  
神仙富貴兩蹉跎徒作諸侯一賓客  
尉陀城南十月時梅花開早菊花遲  
與君

往往談王霸笑殺當壚嬌女兒我在山中無素業清高亦  
與屠沽接道成不肯居神仙氣使翻然作豪俠英雄自古  
一浮雲求道應從鸞鶴羣有金且買東方妾有酒且醉信  
陵君縱心寫意無不可聲色之中知是我天生我輩自長  
生不似二豪爲蜾蠃

### 鍾山

高高雙巘削屏風紫翠晴飛萬井中一自軒皇成寶鼎遂  
開天闕作元宮千秋龍虎歸眞主六代煙花送狡童歲歲  
韶璫馳傳至櫻桃春薦思無窮

蒼蒼輦路但斜暉日出衣冠事已非六代松楸辭玉殿中  
峯陰雨見龍旂蠻奴小隊呼鷹過游女春魂化燕歸多少  
哀笳吹不散五雲猶繞御牀飛

紫蒙

紫蒙近接黃花戍黑水斜穿白草軍一道榆關兼扼海雙  
峯碣石故干雲天生飛將都無用人是長城獨不聞愁絕  
遼西征戰後兩河烽火夜紛紛

秋夕別岑公

一片他鄉月秋光亦苦辛每從風雨後來照別離人

子夜歌

熒熒桃李花薄命寄君掌河水雖東流河魚自西上

歸風詞

南越輕綃似碧雲裁爲飛燕御風裙中流舞罷將仙去萬  
歲千秋復就君

霍州道中



太岳青蒼接太行  
河汾襟帶勢何長  
白雲冉冉隨行客  
春草茫茫入戰場

陳恭尹字元孝一字半峯晚號獨漉子順德人有獨漉堂集

詩話元孝少遭家國之難間關江海飄泊無歸憂憤之志一形於詩及三藩之變以重名爲時所忌下獄二百日得脫乃築含羊城之南賴光和尚俗以詩文自娛其詩真氣盤鬱激昂頓挫在江南所作懷古及虎邱題壁諸詩尤傾動一時王漁洋謂其清迥拔俗得唐人三昧其卒也有殄瘁之歎杭大宗弔以詩云南村晉處士沙社宋遺民

虎邱題壁

虎跡蒼茫霸業沈  
古時山色尙陰陰  
半樓月影千家笛  
萬里天涯一夜碁  
南國干戈征士淚  
西風刀翦美人心  
市中亦有吹簫客  
乞食吳門秋又深

宿高臺寺

山南勢盤鬱開豁獨斯宇中天置茅屋上與祝融伍階下  
俯眾峯窗間括南土夜冥江火近日出寒檐雨托宿此最  
高終身未更數

王將軍輓歌

南方有義士姓王名曰興十三學殺人十五手搏狼三十  
建義旗姓名驚一方天子錫虎符作鎮鼉江陽翠華日以  
遠地絕軍彌張百戰環岡州九死披殘疆海濱富斥鹵重  
林與連岡高者掩雲日遠者浮滄茫煮波致財貨鑄冶成  
刀鎗宮室何所居天家侯與王藁粟何所饋從駕子與孃  
心膽何所贈海內豪與英獻客合浦珠薰客珠厓香客處  
未覺寒襖禪先盈箱客寢始覺單妖麗忽侍旁敵兵四面

來眾士各逞強將軍躍上馬命客持一觴獨出揮長戈兩  
目流電光直取首來將生挾歸戎行顧飲所持酒昔熱猶  
未涼相持及三月敵騎皆奔亡來時三萬人半還仍重傷  
奏功自間道涉瘴徂昆明黃金三千鎰玉帛各有筐天駟  
方驅馳下臣效芻蕘臣興味死上帝曰興卿良賚爵列五  
等高獸盤銀章其名曰虎賁將軍盪南荒敵人聞之懼選  
士盈千騎來者左右賢其軍督責之不得此彈丸若輩何  
生爲上天仍助虐其年兼荐饑將軍察天命命匠撻良材  
斲以爲巨棺綵雲懸葳蕤約日出合戰敵怯不敢來堅壁  
十里外遙邇興長圍溝壘內外防突援無所施始從戊戌  
夏雨及中秋期戰士飯草土抱骨環登陴所憂負將軍吾  
儕死猶歸將軍曰嗚呼共盡終何裨我乃報深恩汝當存

宗支乃命幼子九先出卑其辭卜吉結歡會敵將不致疑是夜一更終將軍訣所知皎月當中天千秋同此時語已還閉門沐浴更裳衣夫人翠鳳冠有母頭如絲侍妾十五人左右皆肩隨肅肅何離離俱集園東陞上有古梅樹樛結垂高枝白石爲几席月露明蒼苔將軍命夫人拜別而慈闈拜畢與將軍四拜中間居十五妾羅拜窈窕無參差夫人命斗酒有脯形如圭深藏待今夕各當行一卮卮盡且先起母與君稍須將軍及母入燭影何迷離夫人十五妾自掛臨中閨阿母大驚呼將軍言勿悲著我錦繡袍麒麟當心閒戴我七梁冠簪纓鬱崔嵬玉帶與璽書次第皆抱懷置敕中堂上花燭榮且輝望闕遙謝恩臣死有餘辜下堦十二拜天地及四隅徘徊望西堂有虎顧其兒平生

愛此圖拜汝今同灰卷圖附敕下釋服趨房間房中何穹  
隆火藥堆如山將軍踏小几自解夫人纒次及妾十五列  
置火藥端出戶著朝衣捧敕仍來還一聲母急出火烈焰  
貫天雞鳴部曲入白骨空噴吮舉哀建素旒合斂歸巨棺  
敵人亦流涕況在同肺肝卜葬三陽山隱約題墓門陳子  
作輓歌播之永不刊

懷古

燕臺

燕南燕北戰爭餘白草漫漫雪色初河渡堅冰通下博關  
門沙路走居胥死求馬骨言終驗生堪秦胸計已疎猶有  
興亡數行淚夜來彈與樂君書

姑蘇

形川集言圖卷一ノ  
澹煙疎雨闔閭城潮水千年恨未平寶劍賜來吳命短美人恩重父讎輕宮梧葉落隨流出臺鹿春歸引子行何處扁舟人去後鑄金猶得似平生

楚中

衡雲巫雨暗江津江上孤吟過一春二女廟邊逢淚竹大王風急到青蘋虛無玉駟朝天闕慘淡雲旗降楚神終古靈均詞賦在湘南山水倍關人

咸陽

關門一夜柳條春今古芒芒草色新龍虎有雲終王漢詩書餘火竟燒秦瑤池西望猶通鳥渭水東流不待人最是五陵遊俠客年年磨劍候風塵

沛中

漢王生長難忘處，尺土猶書故宅名。四海自飛鴻鵠羽，中  
宵人哭白蛇聲。輕沙淺草堪調馬，習俗羣兒敢說兵。千載  
英雄同一轍，徐州南是鳳陽城。

洛陽

敝車驚馬雒城邊，盛事空憑故老傳。嵩室有聲君萬歲，土  
圭無影日中天。禮亡已驗伊川髮，涕下徒傷賈傅年。莫問  
漢家圖畫處，丹青磨滅化苔錢。

蜀中

子規啼罷客天涯，蜀道如天古所嗟。諸葛威靈存八陣，漢  
朝終始在三巴。通牛峽道連雲棧，如馬瞿塘走浪花。擬酌  
昔賢魚水地，海棠開徧酒人家。

鄴中

山河百戰鼎終分歎息漳南日暮雲亂世奸雄空復爾一  
家詞賦最憐君銅臺未散吹笙伎石馬先傳出水文七十  
二墳秋草徧更無人表漢將軍

金陵

山飛樓閣水飛霞冷落春城宿乳鴉天闕雙峯鋸似戟海  
門高浪白如花空勞御輦銷王氣曾畫長江作帝家五馬  
渡邊龍化後南方文物掩中華

隋宮

穀洛通淮日夜流渚荷宮樹不曾秋十年士女河邊骨一  
笑君王鏡裏頭月下虹蜺生水殿天中絲管在迷樓繁華  
往事邗溝外風起楊花無那愁

戊辰正月十日舟泊端州王礎塵自開建適至今子



紫巘招同李蒼水過集高雲客所寓華嚴精舍縱  
飲達夜卽事成歌

正月溪山餘暖氣炎方別自爲天地乘興拏舟入峽來故  
人恰自康州至客中無地可爲歡高君況在郊南寺落落  
乾坤數老翁天涯相見俱憔悴賢郎高燕爲客開李生後  
至初揮杯登樓曠望見原野定山數點青崔嵬園桃一樹  
紅如火折向瓶中如笑我東風只自戀新枝何處林間尋  
碩果年當壯盛好努力白髮生來無一可且燒高燭佛鐙  
前狂歌縱飲開新年東南之美畧已具人間此會非徒然  
爲君白眼望青天

登湛禎士新閣

新構閒齋事事幽簾櫳清寂勝前游疎籬引蔓時妨帽老

樹扶人共上樓暮雨千家聞短笛東風一綠徧平疇園林  
煙景元堪畫況有數峯來上頭

八月八夜王子千招同陳韶州毅齋遲靈山屏萬梁  
藥亭廖南暉屈翁山集廣州行署咏月

高會仍同趙尉樓上弦新月近中秋半輪似欲依華轂破  
鏡唯能照白頭銀漢欹斜初雁過金風蕭瑟暮雲收更憐  
一片如輕舫明夕隨君到惠州

秋夜同梁巨川盧僦斯過宿潘子登寓齋早起別去  
與巨川登錦巖次子登韻

步屨閒階月滿堂更浮香茗對幽篁人過中歲衰難寐酒  
到深更醒亦狂竹榻夢迴餘舊淚絺衣朝起趁新涼不堪  
共上高巖望江水迢迢似恨長

杜濬字于皇號茶村黃岡人明副貢有變雅堂集

詩話茶村避亂居金陵慕詩名者踵至多謝絕之錢牧齋造訪閉門不與通其高峻如此詩亦微辭自遂尤長五言吳梅村嘗云吾五言律得茶村焦山詩而始進間百詩於時流多所訾謗獨許其五律稱爲詩聖

遊靖江孤山

邱壑性所耽未嘗棄拳勺矧茲江海間一石頗巉削隔宿  
嘯遊侶凌塵理芒屨舟行屢延望先見惟楮閣旣登必造  
顛長江四迴薄梗斷託一方風沙年代作左瞰特無際舉  
手揖海若遠水流下天餘波噴爲壑綠疇亦云廣晚田猶  
未穫孤城炊數家闕狀如舫怕降尋及山根了見夕陽腳  
古苔詎人繡怪石倘天鑿逐景至於晏會心方命酌寂寂  
無人知秋英澗中落

遊夾山漾

出塢謝羣賢放舸理長嘯煙岫映澄波始知所歷妙林壑  
羅秋姿紫翠冑寒照蘋汀欲爲雪楓岸忽如燒目逐絕境  
往意愜佳氣要層峯何嬋娟灣環亦窈窕泛漾疑江湖回  
帆復蘿薦面面見道場一一起憑弔尋幽不覺遲歸晚顧  
而笑石門免見訶登樓感同調

九日一草亭時將與天章別感賦十六韻共用日字  
秋深雨廉纖意外晴此日薄雲雖未歸解散已可必危坐  
傷我懷雅意不欲出歛聞良友招不待盥漱畢登高一草  
亭豈在山岑犂幽人先入座鳴琴未離鄰盤榻但隨時盃  
香帶橙橘暫覺百慮蠲遊從任疎密叢菊花故遲黃蕊苞  
漸茁籬蔓弱迎霜宛結小紅實獨感薜荔枝來時伴蘭栗

於今已扶疏殘陰映綳帙白頭久飄零俗態如蟣蝨遙遙  
三令節過眼亦何疾念此動哀腸匪第憶家室悵別方自  
茲歌笑忽如失

關山月

上有關山月下有隴頭水月照行人不記年流水無情流  
不已月淒清水嗚咽非秦非漢腸斷絕

初聞鐙船鼓吹歌

一聲著人如夢中雙槳再下耳作聾三下四下管絃沸鐙  
船鼓聲天上至居然列坐倚船絃驚指遙看相詫異鼓聲  
漸逼船漸近亦解迴環左右戲急攢冷點槳猶澁春雷坎  
坎初驚蟄吹彈節鼓鼓倔強中有閒聲闌不入吁嗟此時  
聽鼓止聽鳴誰能打拍聲裏情誰能眼底求精妙乍許胸

中見太平太平久遠知者稀萬厯年間聞而知九州富庶  
無旌麾揚州之域尤稀奇誰致此者帝軒義下有江陵張  
太師江陵初年執國政樂事無多廟謨競爾時秦淮一條  
水伐鼓吹笙猶未盛江陵此日富强成聖人宮中奏雲門  
後來宰相皆福人普天物力東南傾豪奢橫溢散向水此  
水不須重過秦王家謝家侈紈袴湖海遊人鬪詞賦廣陵  
女兒絕可憐新安金帛誰知數舊都冠蓋例無事朝與花  
朝暮酒暮水嬉不待二月半袷服新妝桃葉渡高樓夾水  
對排窗捲起珠簾人面素騰騰便有鼓音來鐙船到處游  
船開燭龍但恨天難夜赤鳳從教晝不同皇天此時亦可  
哀龜年協律正奇材善和坊接平康街弄兒狎客多渠魁  
船中百甕梁溪酒膽大心雄選鋒手蘇州簫管虎邱腔太

倉絃索崑山口鎮江染紅製瓔珞廿碗珠鐙懸一角當前  
置鼓大如筐黃金釘鉸來淮陽此聲一驪眾聲集不獨火  
中聞霹靂風雨叢中百鳥鳴旌旗隊裏將軍立熬波煮火  
火更然積響沈舟舟未溼可憐如此已快意未到端陽百  
分一記我來時卯與辰其時海內久風塵石榴花發照溪  
津友生置酒我爲賓下船稍遲渡口塞踏人肩背人怒嗔  
鐙光鼓吹河河徧銜尾蟠旋成一串蔽虧果覺星河覆演  
弄早使魚龍顫眾人洶洶我靜賞初奏此時差可辯須臾  
光響相糾結惟聞森森沈沈直上翻雲漢東船西舫更交  
加下視何由覩寸瀾偶然閃儵透水處如金在鎔風掣電  
樓樓堂客白下稱內人爲堂客船船妓近不聞聲遠察面嗚呼此時  
鐙船更難動但一作坐飽食揮槌調絲按孔相凌亂侯家

別攜清商部那得於中聞唱歎復有劣鼓與劣吹就中藏拙誰能見爆竹聲低煙霧濃暫借香風解霑汗露零雨下不得退樂極生悲真可厭酒醒忽迷此何地魂銷畧記伊堪戀直至明朝亭午船鬆卻退人相羨歸來沈眠須竟日流鶯啼破河陽戰此後遊人數日稀清淮十里桃花片記得座中客能說王穉登穉登搥鼓湘蘭舞賞音擊節屠長卿後來好事潘景升晚節猶數茅止生絕藝於今誰作主李小大歌張卯舞當時惆悵說於今忍見於今又說古年復年來事可歎鎧船伐鼓鼓不歡辛壬之際大饑疫惟見鳳陵烽火照見秦淮白骨橫青灘桃葉何須怨寂寞天子孤立在長安吾聞是時宰相薛復周黃金至厚封疆仇公卿濟濟咸一德坐令戰鼓逼龍樓甲申三月鼓遂破斷管



殘絲復誰和半閒堂裏起笙歌平章舟止稱朝賀試問當時雷海青堦下池頭還幾箇新劇惟傳燕子箋殺人有暇上游船行人何必近前聽荼毒鼓中無性命同時阿誰伎畜爾惟有劉黃高左五侯耳君不見師延靡靡濮上水未若玉樹後庭美賞音何人丞相韜相對掀髯復切齒一撥絃中半壁亡一棒鼓中萬人死鼓急絃驚曲不長兩年歇絕隨漁陽有客徒憐橋下水無人不斷渡邊腸及此相看眞分外何許藏舟一舟在拂塵捍撥初光輝奮槌揚袖藍縷衣不鐙漫乘夕波出無伴知從何處歸爭新誇奇各有故君看西風桃李枝西風一枝眾稱異東風萬樹空爾爲入耳悲歡難具說醉裏分明寸心熱嗚呼漢代金仙唐舞馬此事千年無有者興亡不入心手間然後聲音如雨下

探湯搥鼓疾藜刺應有心肝礙胸次餘音漠漠攪飛絮鐙  
船鐙過橋去過橋去傷鼓聲長歌短歌當成隴西李賀  
抽身死舉杯相屬樊川生此生流落江南久曾聽當時煞  
尾聲又聽今朝第一聲

聞子規

四月三之日子規驚夢魂天高吾不問春去汝何言口血  
腥花氣關河阻劍門此方多挾彈未可恃君恩

元日

元旦我無事梅花伴讀書天心連日見人跡向來疎既雨  
難忘酒方春孰荷鋤客情原至介三嘆對盤蔬

乙丑季夏傷足伏枕歷秋未瘳屢荷素園見顧殷殷  
偶留小酌限作二律同用知秋二字君詩先成依

韻和答

吾道危如一木支誰憐雙足數還奇  
呻吟轉側今何地跋扈飛揚彼一時  
同調相期金可斷異方多難藥難知  
留君小飲余先醉爲愛西泠七卷詩

濯足空談萬里流朝昏惟守戶庭幽  
故鄉久別終思奮好友頻來不帶愁  
白髮丹心千古意黃花紫蠟一年秋  
何時造爾能扶杖不羨乘車馬少游

十月十日蔡鉉升載酒飲我於病榻  
練江南枝二詩

衲偕至

擬上籃輿散百憂素交排闥且淹留  
情親各出三年字身

老猶憐一日秋

明日立冬

客舍自晴黃葉雨鍾山不動白雲遊

持螯快飲成今會大有齊盟在後頭

泰州絕句

窮海三秋盡扁舟百里行夕陽無近色偏照遠帆明

閩友談水東之勝

魚愛深池鳥愛叢君談句句合幽踪憑將骨與青山誓老  
號詩人杜冰東

雨

時前民將  
欲別余

冬暄何可恃一夕起層陰落盡衰桐葉方知急雨心暗停  
南浦棹寒折北齋琴鄰舍知幾早多時響暮砧

焦山

觸處迷人代茲山尙姓焦上頭仍棟宇到眼忽雲霄樹色  
南徐近江聲北岸遙衣冠留洞壑不必訪松寥

遠跡滄江曲山情寶澹然石根爭插水樹杪欲浮天莫起

蒼虬卧端如處士賢再來應酹鶴把酒坐高堙

八年前一到車騎亂青蒼賸此題詩客來尋置酒堂飢鷹啼半嶺野馬戰斜陽實有悲盈谷非關弔夜郎

出郭來差遠憑高望獨深江分神禹跡海見魯連心密竹藏金像回流灌石林擬尋幽絕處卻誦白頭吟

摩碑臨積水折竹杖危坡不向山中住甯知幽處多雪埋孤衲笠風亂老漁蓑荒卒存真意余心不厭過

僧堂陳古鼎青綠略參差沙劫何多故商周僅片時神工疑太淺怪物復安施不必論眞贋風塵忌獨知

杜芥字蒼略號些山黃岡人明諸生有些山集

同徐松之登山上人草閣

雨餘山黛豁攜手問郊原茗色青于樹花光紅過村愛僧

能種菜禮佛恰窺園默坐忘酬對都歸畫旨論

寒食同枕江作

墓田春草色花信落梅風倚檻今朝立憐君客況同炊煙  
微覺冷酒盞不妨紅莫作焚林嘆荒蕪舊絳官

贈羅山行僧

一鉢羅山下千針破納縫得龕成古佛掃地種新松塔院  
心頭住形骸市上逢看師行烈日露頂自從容

茸城三月同魏憲姪世農作

今日不宜飲愁來何所之草青猶在眼雲白已多時懶慢  
馮驩缺空濛虞舜祠牡丹開又落不忍酌殘卮

獨鶴亭

嗟峨華嶠孤一徑下雲甸荒草蔓荆榛五嶽誰能辨有鳥

從東來大翮異鄉縣武功雖尺五仰視目不眩圓吭裂層霄丹頂甚平善應惜青城游見困如句踐

甲子八月郎趙客周貞栖讌集宗廣文金陵寓齋分韻

廿年離緒幾回逢曉起城南酒味醲望闕有人攀老桂避塵何處覓長松邗關雁叫三江水秋浦猿呼九節筇舊事半留詞賦在滿江紅奏不妨重

王猷定字于一南昌人貢生有四照堂集

朱錫鬯曰于一以詩古文詞自負對客斷斷講論每舉一事輒原其本末聽之齋心蓋兼有筆札喉舌之妙者其行書楷

法亦自通神

詩話于一長身玉立意氣豁如議論風發談天下事如視掌上紋與梁公遜史遽巷友善杜茶村尤性命交詩沈鬱蕭森五言近體雅近杜老亂中諸作

看月

日見海天低夜見海風苦海水浴天時星辰皆作雨惟月  
下海中百道金光聚波響月可聽波來月可取試問山中  
人月來幾寒暑

舟泊揚子橋

韎韐風濤外閒心寄沈寥馬嘶黃草岸人急暮江湖塔影  
眠寒水谿聲走斷橋夢中敲古缶長憶廣陵簫

舟行

海陵城忽過四望遠濛濛布被經斜雨蒲帆飽大風驚鷗  
飛不定初柳意無窮三月今朝是扁舟東復東

螺川早發

月落秋山曉城頭鼓角停長江流遠夢短棹撥殘星露溼



鷗衣白天光雁字青蒼茫回首望海嶽一孤亭

返揚州喜晤孫無言

卻訝秋還在蕭條滿目非江山千騎暗城郭一人歸見子  
南冠淚猶驚楚客衣庭花何爛漫寂寂伴伊威

宿白雲菴

寒鐙寂照夢難成但覺逢僧尙有情關外客船喧野岸枕  
邊官馬踏殘更兩淮烽火人初靜千里星霜雁獨征爲弔  
漢家辛苦月夜深猶傍釣臺明

訪陳師黃絕句師黃爲靖南參軍

北狩當年事忍聞至今惆悵靖南軍可憐血戰殘衣在板  
子磯頭幾片雲

中元前一夕泊石門聞岸上作浮屠事泣然有感

石門陌巷柳青青舊日鐃聲此夜聽枕上有魂招不得秋風腸斷語兒亭

李世熊字元仲別號愧庵甯化人明諸生唐王授翰林博士不就有寒支集

詩話元仲當王師入閩時郡帥迫之就徵以死自誓有諸葛痺躬之日僅少一年文山盡節之年已多一歲之語山居四十餘年氣節文章爲海內宗仰其文沈深峭刻自成一家詩不甚稱於時然亦戛戛獨造間效長吉尤與宋遺民謝皋羽爲近

紫金山

山圍人鳥路孤筇迷出入樹石放奇情分壇勢相逼石或化爲樹樹或化爲石石池澄寒波落落松陰直冥茫息峯頂崎嶇憇幽室耳目及心神喪之而後得山深巷宇尊諸佛現眞魄梵聲肅以放物理自來格我心山灼見山性我

微獲

雨後月出潔逾晴晝竦然作此

寒雨肅然止族雲避孤月月鋒布威嚴萬翳落如刷屏息  
承靜清恭默思超越叩帝更無聞乘空亦有筏澄汰千載  
塵浣滌山川骨爽然遊泰初人天不容髮

秋懷

坐卧斗室中書卷奏新效神來勿驟往斟酌使克到焚香  
取煙初賞茗在味少潔此徑寸懷遂與秋照耀月以霜尊  
嚴雲得天高妙良友雖各方是中可談笑

還山

出處滄桑外呼天虎豹高少年慚賈策曠志及原騷筆冢  
難酬脯車騶每對醪晴陰還造物攘攘爾何勞

山居

愚公智叟總灰塵豈有虛名染汗青  
供鶴朝添甌甕米相  
牛夜理角毛經墨莊有興時分竹酒國無朋號獨醒  
疊二錯三教孺子笑人杜撰少微星

和陶歸園田

自古養志者逖跡於深山一往將終焉豈復知歲年有時  
罹世網如魚脫於淵歸來不爭里治此無競田逸然雲霞  
姿潏灑眉睫間相逢共談笑乃在羲農前試語寵辱事寒  
灰久無煙紫芝出礪底元木生巖巔心隨麋鹿遠跡與鷗  
鳥閒我願從之遊朝夕同悠然

士方不遇時意氣常鞅鞅野鶴在鷄棲能無雲際想羽毛  
正離披九霄安得往君看園中蔬靜聽膏雨長人生何不

爲心定志自廣衡門且棲遲因風適蒼莽

賀貽孫字子翼永新人有水田居詩存

詩話子翼生明季長遭亂離備嘗艱苦集中有丙戌避亂茶陵庚寅山中度歲壬辰被兵折臂戊戌易僧裝諸題順治初江右甫定又有金聲桓王得仁之亂居民深受兵禍其詩鬱鬱苑結多感感不自得之語則所遭之境使然也

雨

急雨來石壁飄然空外瀉遠樹溼殘紅徘徊鶯不下好鳥  
尙惜春孤花已報夏鐵馬從東來陰雲慘欲射誰向蟠溪  
隱蓑笠恐不暇寄愁與東風注目寒江夜

秋懷

蟋蟀復蟋蟀聽爾當窗織秋聲從爾出萬籟又瑟瑟清商  
本無心耳目漫相易塞北有佳人玉顏不及惜長抱悲秋

心徘徊淚沾臆晚雨滴芙蓉如見明妃泣年年胭脂山負此高秋色

霜氣飽黃花霞光醉白鳥山高秋復高秋逐煙與草物性相因緣誰能割昏曉我心同孤月淡蕩寄天表不夜魄常圓無雲風自掃秋色本自如何勞費幽討世人貴耳目漫羨素娥皎躡梯上廣寒不識門前道惆悵月中人銀丸弄空藻

寓栗坪茅屋

結茅天半渺無涯靜夜空山絕物華夢裏風聲翻紙帳雨邊螢影落鐙花青精味易和麤飯綠柏香難鬪苦茶獨喜埋名今漸久無人問字到山家

陳允衡字伯璣號玉淵南昌人有愛琴館詩集

詩話王淵寄寓蕪湖體甚弱雖盛暑猶擅巾絮帽性嗜書枕席舟車縹緲環左右嘗選詩號國雅又有詩慰傳本甚稀

王安又招同施次仲周鶴田諸君游響山兼訪杓司不值

探山只數里倚棹變陰晴草樹依城轉鳬鷗傍水輕松風生夜色人語雜谿聲隱者不可見空餘釣石情

步自杏花村遵湖隄過鐘樓至上藍寺同王尊素程鳴玉訪堅忍拙生二開士不值歸路得詩

古寺閒尋得籬疎竹數竿僧偏渡江早客正入山難土銼煙初斷香臺影自寒皈依何日是愁思又無端

魏闕字明闕漢川人有清風遺集

詩話明闕爲明諸生甲申後奉親居龍耳岡學易三十年足不入城市康熙中張中丞朝珍爲築室清風

橋左師事之不久辭去時有朱方旦者自號二眉山人挾術數游公卿間投書明闕答以古非常人固有非常術業然考其素不過信庸言謹庸行耳禍福當自問不當問人方旦卒以左道感世見法明闕自言死當以四午其卒以康熙十七年五月十九日正中實爲四戊午事見張中丞祭明闕文善術數者不言術數固非江湖游士所能知也

書懷

客居偷歲月戶外聽寒砧看竹身無力尋僧雨又深十年雙白髮萬事一孤琴此意如何語松溪夜夜心

吳柳塘寓漢陽郎官湖太白祠東邀余飲酒

太白祠東訪柳塘傾尊促膝話偏長是湖久幻爲城郭此地翻疑作夜郎兩部新詩開混沌千年後死著文章樓船偏上心如雪莫使浮雲詠鳳凰

雨宿白衣庵贈卻塵上人



鬱苕高鎖木蘭隈座借鐙王靜室開江鶴掠同盟野夢鉢  
龍飛去觸天雷梵銷急雨桃花漲魂繞層巔金闕苔卧覺  
風慙心與動就中誰可惠能才

重修黃鶴樓成

鶴樓重建鎮江東畫棟依然插碧空玉笛梅花新夜月金  
沙芳草舊春風乘雲羽客名還在賣酒人家姓不同此日  
登臨舒醉眼煙波淡蕩夕陽中

余齋字生生號鈍庵青神人有增益軒詩草

詩話生生爲明兵部尙書肅敏公子俊之後世襲錦  
衣自蜀徙燕者已數世生生當國變避居四明築小  
樓署曰借鑑蓋以鄞西湖爲賀秘監游息地有  
小鑑湖之目生生久爲寓公故以是示意也

賞梅

挾旬雨不輟淒風日飛颺庭梅斂光彩生意何微茫天地

忽開曠靜院飛晴香玉色映朝暎疏影隨風翔陰極陽未  
動氣機不可量百卉亦因時幸哉化日長

梅花

市上何人識故侯青鞋阜帽稱心游相逢頭白留詩別細  
雨孤帆下虎邱

花時歸客怕花殘烽火漫漫行路難斷送春風多少恨憑  
誰留寄一枝看

黃居石字慎闇號圯仙新會人有自知集

詩話圯仙隱居專力於詩時有憂生念亂之作如前  
後徙村行述國初海濱遷界時事又有哀江門篇句  
云甲辰辰移海盡邱墟古廟獨存新市側蓋亦是時作  
牧馬行紀尙之信藩部兵初至牧馬擾民羊城秋意  
秋興諸篇前哀紹武之亡後慨  
一平南之敗黍離麥秀悽惻纏綿

督耕

不耕受其飢食力宜耒耜春有事西疇入夏共耘耔所望  
在秋成終歲勤如此上以輸征賦下以甯婦子埋名畝畝  
間河清或能俟東鄰華蓋新已聞書怪字北里紫駟驕昨  
報沙場死榮枯易朝昏何如荷鋤子堪笑南陽人一出終  
多事

吳城曉發

凌晨方挂席已出望湖亭野店明殘火秋江落曉星雞聲  
寒草屋雁影起沙汀浪迹知何似飄飄學水萍

鄢城除夕

老去驚年速愁來怯路賒身貧輕作客世亂易離家柏葉  
虛浮酒椒盤不頌花妻孥當此夕應念隔天涯

贈陳三谷

一壺煙月一藜筇短髮逍遙粵海東茶臼響生塵碾綠藥  
爐香發火蒸紅麻衣宰相雲泉裏玉洞真人市肆中若使  
相逢如魏武休教草檄愈頭風

楊應麟字吉庵真安人

詩話真安卽正安舊隸四川雍正間移屬貴州吉庵  
當國初孫可望陷遵義以人爲糧力爲營救民多賴  
以活晚研易理撰易經辨義

過鄰家

策杖無專適因過鄰叟家數杯缸面酒三椀雨前茶地僻  
猶棲鳥林深尙有花不堪時極目羣盜正如麻  
郭勸字以歌湘潭人明諸生有松籟堂存草

舟過昭山

古剎猶如故輕舟拭目過岸低煙影小林密鳥聲多花濺

游人淚漁通下里歌客心今又起憑弔寄滄波

郭嘉屏字嶠山均州人諸生有嗣斯集

詩話嶠山明季諸生詩清婉不染當時風氣入國朝不復應試以生僻壤編明遺民詩者網羅所未及遂令姓氏翳如

秋夜浪河舟中

忽有臨流興添衣上小船涼風吹白月野水泛青天樹裏星辰度巖邊鷗鷺眠乾坤同一靜幽渚幾茫然

晚晴移詩匯卷十八終

晚晴移詩匯卷十九目錄

錢謙益 七十首

晚晴籀詩匯卷十九

徐世昌

錢謙益字受之號牧齋常熟人明萬厯庚戌一甲三名進士厯官禮部侍郎福王時爲禮部尙書入國朝以禮部侍郎署秘書院學士有初學集有學集

鄭則厚曰虞山學問淵博浩無涯涘其詩博大闳肆  
鯨鏗春麗一以少陵爲宗而出入於昌黎香山眉山  
劍南以博其趣於北地信陽王李鍾譚諸作者尤排  
擊不遺餘力萍浮草靡之徒始稍稍旋其而日本朝  
詩人輩出要無  
能出其範圍  
詩話牧齋才大學博士持東南壇坫爲明清兩代詩  
派一大關鍵譽之者曰別裁僞體轉益多師毀之者  
曰記醜言博黨同伐異要其驅使百家雕鏤眾象非  
一邱一壑者此所編明厯朝詩集於北地信陽過事  
裁抑爲後人所議今錄牧齋詩  
當獨門戶之見以持其平焉

嫁女詞

中堂何喧闐明燭耀銀缸箱簾啟菱蕤刀尺聲硯硯大姊  
裁羅襦小妹熨袴褶鄰女贈錦段雙雙繡鴛鴦阿母鬢婆  
娑簪鐙理中裳阿母向我言撫汝嬌且長十載違汝家顙  
頰類嫋嫋輕軒脊在門重整嫁時裝女行欣有家阿母心  
內傷牽衣向阿母背指鐙燭光女身如明燭影在阿母旁  
有家亦云久結褵在高堂云胡背君子不得奉尊章歸甯  
十餘載道路阻且長欲絕忍棄捐欲往河無梁戢身事慈  
母顧影守帷房獨坐親圖史行步施珩璜懷哉茅苴詩誦  
彼浥露章豈若魯潔婦陌上行採桑菀絲生陂田終不慕  
高岡芙蓉悴秋風其名爲拒霜我生不有命胡爲怨空牀  
空牀雖獨守終然念所天主人良高卧臧獲偷晏安薪突  
誰與徙井臼或不完祭祀廢春割寇盜隳牆垣百憂攬我



心逼迸不得言  
搥牀復倒枕  
豈爲兒女歎  
終身一與齊  
棄捐永相關  
況我非棄婦  
何能不執爇  
不見漆室女  
倚柱起長歎

長歎亦何爲  
會合當有期  
懷君雙明珠  
中夜生光輝  
沈淵何足悼  
光彩諒不虧  
綺衣與綦巾  
理我嫁時衣  
衫服及春風  
何能待秋時  
醜婦憎明鏡  
眾女疾娥眉  
琴瑟貴靜好  
閉戶理朱絲  
行行遠阿母  
回頭涕漣漣  
翩翩辭歸燕  
向我飛差池

吳門送福清相還閩

都門祖帳藹如林  
卻望彤墀淚不禁  
出處頻煩明主念  
安危限老臣心  
夢回漸覺朱衣遠  
身退初知白髮深  
林下有人君側少  
知公未忍說投簪

上日帝高居儼肅雍中書退食敢從容舉朝水火和羹苦于  
野元黃戰血重四海憂來頻緩帶隻身朝罷每扶筇可知  
報主心如醉久矣愁聽長樂鐘

介圭爭望錫河山忍聽優歌枯苑間春盡親王將就國夜  
分御札尙封還赤心自憇縈千折丹地頻驚扣九關羽翼  
已成商老去漢庭容易點朝班

恭謁長陵

文皇神武唐宗後靖難功成戰血殷鐵騎至今趨朔漠玉  
衣終古鎮燕山峯迴屏障諸陵拱日落旌旗萬馬還前後  
北征多侍從承平忝竊史臣問

碧雲寺

丹青臺殿起層層玉碣雕闌取次登禁近恩波蒙葬地內

家香火傍禪鐙豐碑鉅刻書元宰碧海紅塵問老僧禮罷  
空王三歎息自穿蘿徑挂孤藤

寄東江毛總戎

鳴綠江頭建鼓旂間關百戰壯軍威青天自許孤忠在赤  
手親擒叛將歸夜靜舉烽連鹿島月明傳箭過鼉磯紛紛  
肉食皆臣子絕域看君卧鐵衣

十一月初六日召對文華殿旋奉嚴旨革職待罪感  
恩述事

久知不去又將鉗無奈時情似蜜甜薄命東華縻月俸虛  
名南斗動星占出山我自慙安石作相人終忌子瞻伏闕  
引刀男子事懶將書尺效江淹

事到抽身悔已遲每於敗局算殘棋都門有客送臨賀廷

辨何人是魏其楊柳曲中游子老車輪枕畔逐臣知寒鐙  
冷炕懷涼夜不醉何因作酒悲

孤生半世飽艱辛敢恨虞翻骨相屯吾道非與何至此臣  
今老矣不如人養成枳棘難爲橘刈盡椒蘭不作薪每誦  
韓公晚香句整襟時一慰沉淪

破帽青衫又一回當筵舞袖任他猜平生自分爲人役流  
俗相尊作黨魁明日孔融應便去當年王式悔輕來宵來  
吉夢還知否萬樹西山早放梅

兩月春明席未溫眼看深谷又高原金多爭羨雒陽路禍  
至方思上蔡門五鼎食烹皆主父三期賢佞總王尊莊生  
能悟逍遙理只爲精思曳尾言

獵獵寒風歲逼除柴門剝啄到雙魚親憎言祿催偕隱友

賤求名勸著書薄俗休官如物故畏塗削籍當遷除夕陽  
亭下城西路歎息何人返做廬

陸宣公墓道行

延英重門晝不開白麻黃閣飛塵埃中條山人叫閭哭金  
吾老將聲如雷蘇州宰相忠州死天道甯論乃如此千年  
遺觀歸不歸兩地孤墳竟誰是人言藁葬留忠州又云徵  
還返故邱圖經聚訟故老閔爭此朽骨如天球齊女門前  
六里路蕎麥茫茫少封樹下馬猶尋董相陵飛鳧孰辨孫  
王墓青草黃茅萬死鄉蠅頭細字寫巾箱起草尙傳哀痛  
詔閉門自驗活人方永貞求舊空黃土元祐青編照千古  
人生忠佞看到頭至竟延齡在何許君不見華山山下草  
如熏石闕豐碑野火焚樵夫踞坐行人唾傳是崖州丁相

墳

松談閣印史歌爲郭盾伯作

六書繆篆用摹刻大者符璽細印章崩崖古隧取次出鏤  
金琢玉爭弄藏關中郭髯最好古十年搜討盈篋箱部居  
州亂作譜牒編次細帙盛縹囊璀璨丹砂照蟲鳥錯互金  
薤堆琳瑯攷正職官本二史貫穿訓故窮凡將竊取正用  
史家法豈玩小物塗朱黃憶昔先朝席豐豫符瑞紛沓徵  
禎祥河清鳳見屢奏賀玉璽又報來臨漳先帝親御文華  
門制詔臣下風四方千官鶴列瞻負展衝牙雙瑀聲鏗鏘  
中官屹立當御座插冠貂尾加金璫紫泥封圻青囊解金  
銀賸組開輝煌臨軒手持四寸璽俯示陞城周兩旁槃龍  
紐螭弄掌握衫袖照燭回虹光侍臣代奉傳國寶殿中不

用尙玉郎鴻臚傳制百僚賀文曰受命壽永昌朝罷君臣  
咸燕喜南面竝進南山觴豈知瑞應不虛見中興天以授  
我皇郭君此書精且良曷不首勒玉璽圖訪問禮官摹尙  
方如服有冕網有網蠅頭細字注幾行吾詩附璽垂久長  
命曰印史非誇張春秋之義微而彰

戊寅九月初三日奉謁少師高陽公於里第感舊述  
懷

倉皇出鎮便門東單騎橫穿萬虜中拊手關河歸舊服側  
身天地荷成功朝家議論三遺矢社稷安危一畝宮問道  
邊廷饒魏絳早懸金石賞和戎

劍眉山鼻戟如鬚生面麒麟可卽圖渭水師臣爲後輩金  
城老將作前驅掃清君側誠難事恢復遼陽豈廟謨當享

何煩三歎所秋風吾已穩菰蘆

汶上道中逢故人

衰林匹馬尙天涯寂寞山城菊自花  
逐客已非周太史故人猶是魯朱家  
心如老鵲迎秋晚身似賓鴻傍日斜  
淒愴朱梁舊祠墓汶陽田北看歸鴉

雲中楊伯祥館丈

延麟

過訪山堂卽事贈別

去年燕山雪如掌巢車雪暗胡塵上  
紫髯參軍匹馬嘶黑頭總理韓刀響  
今年江南春雪飛雪花滿頭來款扉  
菡萏鐙前談戰壘梅花樹下看征衣  
自從瞽史持漢節金繒輦載邊庭血  
虜騎爭誇曳落河廟堂自倚中行說  
翰林飛書叫帝閭至尊感激激模御牀  
但令中使催房琯指盧督師肯爲金人縛  
李綱指伯祥賈莊戰血高樓櫓元戎堂堂徇旗鼓周處



詎死齊萬年

指齊師

韓愈甯作孔巢父

指伯祥

匣天鋒刃一頭

顧鬼護神搗九死餘秦庭自效無衣哭漢黨終慚舉網疏  
明發堂中酌君酒笑問于思無恙否神州幸免犬羊族太  
史何妨牛馬走酒闌耳熱夜欲分錯莫同雲是陣雲紅袖  
白衣猶未返彤弓竣矢竟何云江天漫漫失山樹雪柱冰  
車塞行路江南老翁鬢如雪擁鼻吟詩送君去

九月望日得石齋館丈午日見懷詩次韻

敢云吾道大相顧此身微土室青鐙火柴門白版扉垂綸  
收釣具鍊石補漁磯小艇西湖曲延緣候汝歸

丹地披肝日彤墀濺血時帝容伸頰舌天與護須眉棖楚  
甯非教術楊亦我師授書并續史幽繫頗相宜

衰鳳巢何在亡羊徑欲迷已知慚稷契甯忍愧夷齊世事

蕉中夢人情李下蹊夕陽亭畔路只在帝城西  
以爾銀鐙日追余桔槔年詞林原有敘園土亦推先泣夏  
懷明德踰冬憶古賢天涯明發思炯炯一鐙前

登始信峯迴望石筍砭

三十六峯拔地涌此峯跂之纔及踵臨深爲高地使然附  
婁翻能瞰高冢松枝懸度勢獵獵略約孤鶩風從從石徑  
曾無飛鳥度茅菴尙有殘雪擁上視近天心氣肅下臨無  
地魂魄悚平鋪萬狀盡雲練幻出千嵐似邱壘邐迤迴望  
石筍砭萬峯矗矗攢穹蒼故知造化善戲劇遂使鬼物齊  
開張破碎虛空作苑囿搏掬厚土成珪璋孤撐扶陷互相  
詭妥伏威鬪不可詳益州二筍何微眇天平萬笏空迴翔  
起視大壑限尋丈卻立萬仞憑堵牆高陵巨谷堆眾皴都

邑嶺陸分毫芒篆雲一點出九子突煙片縷回池陽心駭  
神移耳目怠積蘇累塊今安在中天恂悅游化人步地蒼  
茫窮豎亥錐鑿將無死渾沌刻畫何當罪真宰經營團辭  
記靈異忽漫執筆成晦昧眼看夕陽信奇絕安知夜半不  
遷改笑殺漚區刻劍人但認一漚作黃海

### 煉丹臺

我登煉丹臺詖蕩上青天旋觀六六峯一一排青蓮崇臺  
據中央宛如蓮萼然千瓣復萬莖迴抱相鉤連玉屏展青  
嶂香鑪霽紫煙奇峯劍危石榴列差髀肩橫若羅劍盾矗  
若奮戈鋌猛若屯天獸疑角夾九閭伏若萬金革縱鳴復  
收旋神靈旣役使頑礦俱騰騫相將守丁甲誰敢窺汞鉛  
日車陽焰煨月駕陰火然至今丹鼎中光氣流朱殷在昔

軒轅帝垂裳理八埏命龍戮絕轡驅虎定阪泉六相資輔  
弼五賊收狂癲藥得君臣配火用文武煎海宇鑪鞴定陰  
陽藥物全然後事修煉黃服朝上玄服食八甲子登假千  
萬年有如世不治慕道求神仙張樂洞庭野採藥黔山嶺  
何異周穆滿車轍馬跡焉軒皇去我久刀圭世莫傳願發  
珠函秘進獻玉房前

### 慈光寺

普門頭陀行光明動帝后兩宮賜荆染少府給組綬脫卻  
金紋衣麻屨露兩肘昆盧金像設梵筵琅函剖煌煌慈光  
額天子維獻壽金貂馳北黜銀榜賁南斗寺踞天都隴面  
勢抗龍首朱砂拱其左疊嶂掖而右飛閣千尋涌諸天四  
圍負龍像震旦尊鐘魚六時吼幡幢內家織齋鉢大官糗

鋪張金世界變現錦陵阜嗚呼卅年來滄桑逼陽九宮移  
長信屢卜應沙鹿久玉衣寢廟重脂澤鏡奩厚八極誠晏  
如三災所時有椒塗恩賜節榆塞金錢走招提佐軍興衲  
衣裁短後我來禮慈光俛仰思文母曾徒日魚雅禪誦午  
譚釵空山猶昇平慈恩正攝受泉流石塔下桃紅碧溪口  
客拜漉水囊僧持掃花帚尙祈白毫力庶復金輪舊頂禮  
九蓮座涕洟重稽首

三良詩

遂安汪喬年歲星也崇禎戊寅賊陷高名衡平仲

素剛中俱被執不屈而死辛巳春賊圍大梁平仲

以御史巡方乘城擊卻之上特命以僉都撫豫賊

去圍我師於鄆歲星以秦督赴援遇賊於襄城力

戰死之是冬賊復圍大梁平仲固守經年九月汴

沈於河平仲夫婦死之嗚呼是三君子者皆余及門之

士余搞項黃馘視息牖下觀其接踵死事橫身殉

國有餘愧焉白樂天有二良文余  
做之以哀三君子作哀三良詩

段賢良含素

段生湖海士矯志營儒術道心既淳泓俠氣亦迸逸臂鷹  
弄丸劍亡羊視佔畢結客少年場握衣大儒室元纁有道  
聘銅墨邑宰秩折腰恥鳴琴蒿目憂化瑟投劾謝京華襍  
被返蓬華汝維彌禋氛汴宋連狂獮咸戴頭迎降多  
屈膝拊心念多壘奮袂起投筆部署及婦女饋餉罄饑餓  
孤城我援絕悉眾賊勢壹衝梯舞崔嵬礮石碎威栗城陷  
屍撐柱巷戰血泌澗堂堂馬翰林並馬困縋縋生得齊慷  
慨逼降互呵叱南雲敢後隄臧洪意同日聖朝崇死優所  
司奏報失千秋萬祀後雙廟應萃輅余昔坐鉤黨訟繫拘  
請室子來訪幽囚再拜慰幽疾遂請職藁膺奮欲負斧鑕

重跡赴畱文酌酒祝元吉昂藏論節義顚顚數國恤盈朝  
誰負擔舉世盡巾櫛植冠髮如竿流吻涎欲溢斯人猶在  
眼其言良可質簪鐙見光芒握衣想削戍哭罷霜滿天詩  
成月東出入戶長歎息陰風助啾唧

汪中丞歲星

汪子循良吏斤斤飭簠簋修謹固足多剽割亦可倚一朝  
擁旄纛三秦爲賜履雄邊當重寄豈能稱指使況復覆軍  
餘兵殘將亦弛驚魂怯鼓鼙敗氣蒙壁壘賊兵下宛雒軍  
威捲熊耳乘勝圍郾城援師絕蜉蝣牽率殘傷卒長驅與  
角觝賊遂拔圍來其行疾如鬼士飽如狼噬馬騰競帆駛  
我師不能軍轍亂復旗靡哀哉二萬人刳屠盡羊豕堂堂  
大中丞孤身策馬箠首已離魚劍胸猶集蝟矢嗚呼數年

來盜賊易綱紀奕棋國謀誤兒戲師律否武夫保項領文  
臣塗腦髓項城傳宗龍喪元襄城汪折趾甲棄戰場外馬  
歸賊營裏徵兵搏泥沙催戰促刻晷但知赴期會誰復量  
彼己歸元國子生免胄先軫喜三敗誰能久一死亦可矣  
憶子爲郎時矯時柱頑鄙抗論每仰屋憤盈或抵几裹革  
固所期興尸亦求是哀哉殉國心耿耿歿猶視長歌聊慰  
藉人生會有死不見韓城相低頭向槃水

高侍郎平仲

平仲巡兩河攬轡出西臺就寇方燎原宛雒蕩刦灰移師  
圍大梁投鞍成覆敦登陴七晝夜死守憑崔嵬累卵我勢  
急中目賊焰推保汴唯汝勞國功帝念哉遂膺全豫寄旌  
節煥昭回解嚴踰夏秋悉眾賊復來長壑截飛鳥巨礮轟



殷雷潛隊穿地裂梯衝舞風頽及堞骨相柱薰穴尸成堆  
負尸我告病濡褐敵未衰是時諸道兵左次大河隈半夜  
朱仙鎮十萬潰喧逐沈城聲援絕饋運甬道隤掘石盡發  
棟陳焦資炊骸噬指徒慟哭大臨誰告哀河伯爲解圍洪  
流夜擊礪我師旣北徙賊戈亦南回優詔許休沐寵秩旌  
厥能還家甫抹馬虜入沂城隳抗辭罵凶醜並命捐匹儕  
吁嗟忠壯士糾纏罹凶災賊鋒仁撞扼奴刃旋提搥自從  
兵興後屠潰自相偕金柝不夜擊和門嘗晝開九攻敵已  
窮三板志不乖方鎮皆斯人王略甯未恢何當大星隕坐  
見長城壞我非哭其私惜此天下才

丙戌初秋燕市別惠房二者

白駒未繫又離筵北斗南箕信可憐壁馬朝周才信宿金

人辭漢已千年房公鵝爲清池好惠子騾因空谷傳龍漢  
劫中期後會灞陵回首重依然

觀棋絕句爲汪幼青作

黑白相持守壁門龍拏虎攫賭侵分重瞳尙有烏江敗莫  
笑湘東一目人

寂寞枯枰響沈遼秦淮秋老咽寒潮白頭鐙影涼宵裏一  
局殘棋見六朝

飛角侵邊劫正闌當場黑白尙漫漫老夫袖手支頤看殘  
局分明一著難

題石厓秋柳小景

刻露巉巖山骨愁兩株風柳曳殘秋分明一段荒寒景今  
日鍾山古石頭

閩中徐永存陳開仲亂後過訪各有詩見贈次韻奉

答

拂水分攜手並招依然陳迹已前朝空傳老父摩銅狄無  
復宮人記洞簫覽鏡頭憎三寸幘看花眼詫一重綃憑君  
話我餘生在萬事叢殘爲領腰

休嗟小別似千年坐膝將車事顯然契闊共循頭上髮延  
緣猶記葦間船高人有福先歸地野老無謀但詛天最是  
臨分多苦語相期把卷白雲邊

交白鬚眉學刺船漁灣蒙密舊山川櫻桃薦寢無消息楊  
柳車攻有註箋南國歌闌皆下淚山陽詩讖倩誰傳繙君  
家集真三歎遺策猶存表餌篇

論交嵇呂更誰如兵燹間關問索居沁雪摩挲新拜石殺

青論勘舊藏書卻看人世同巢幕共笑殘生出後與莫訝  
和詩多譌謎老來誕漫比虞初

夏日識新樂小侯於燕譽堂林若撫徐永存陳開仲

諸詞人並集

天啟七年八月上卽位上聖母劉賢妃爲孝純淵靜慈肅毗天鍾聖皇后

封孝純弟和陽衛正千戶劉效祖爲新樂伯劉繼祖授錦衣衛都指揮同知劉文炳劉文耀授錦衣

衛指揮同知

寶玦相逢溝水頭長衢交語路悠悠西京甲觀論新樂南

國丁年說故侯春燕歸來非大厦夜烏啼處似延秋曾聞

天樂梨園裏忍聽吳歛不淚流

軟腳筵開樂句和濯龍吐鳳客駢羅雖無法部仙音曲也

勝陰山勅勒歌絲竹凝風腰鼓急缸花蕩影舞衫多老夫

苦憶平生事腸斷西游趙李過

書夏五集後示河東君

帽簷欹側漉囊新乞食吹簫笑此身南國今年仍甲子西

臺昔日亦庚寅

畢羽西臺慟哭  
亦庚寅歲也

聞雞伴侶知誰是畫虎英

雄恐未真詩卷叢殘芒角在綠窗翦燭與君論

廣陵登福緣佛閣

危樓切太空塵壒俯冥濛度世香鐙裏降魔應器中上方

三界在八表一雲同鈴鐸人天語如聞替戾風

黯黯經時雨荒荒有漏天豈能羈日月還與滌山川一炬

幽蘭火千門析木煙催歸松漠鳥啼到相輪邊

獨有層樓上偏於象緯親輪中迴日月規外撫星辰北戶

風霜急南柯國土真高高天眼在憑攬析微塵

冥晦乾坤戶迷方何去從禪枝迎怖鴿鉢水候眠龍鐵浴

兵前雨銅崩劫後鐘靈山殊未散清夜禮金容

題金陵一老畫像

髮短心長笑鏡絲摩挲皤腹帽簷垂不知人世衣冠異只  
道科頭岸接離

獨坐青溪照鬢絲小姑何處理娥眉畫師要著樊通德難  
寫銀鐙擁髻時

哭稼軒留守相公詩一百十韻用一千一百字

師弟恩三紀君臣誼百年哀音騰粵地老淚洒吳天殺氣  
南條急妖氛北戶纏行宮踰越嶠留守限靈川倉卒聞風  
潰逡巡厝火然操戈乘內間解甲起中權捲土心仍壯憑  
城誓益堅喧呼齊辦髮奮擊祇張拳刀鋸徒爲爾冠裳正  
儼然歸元髯上礫嚼齒爪中穿苟偃含猶視張巡起欲旋

揚揚神不亂琅琅語爭傳徒抱銜鬚痛誰能咭血憐傷心  
寢門外爲位佛鐙前一慟營魂遠三號涕泗漣修門歸漠  
漠故國望嫋嫋虞殯歌休矣巫陽筮予焉吳羹悽象設楚  
些愴蟬聯魂復新遺矢神棲舊坐瓊靈衣風肅肅幽嘯雨  
濺濺清夜前除酒明鐙近局筵逢迎傷翦紙送別忍燒船  
黃鳥身其百青龍歲半千四游餘渺莽八翼罷騰翥飛鐵  
兵輪重爲銅物冶全庚寅徵攬揆辛卯應災躔君生於庚寅甲子一  
周而終故引庚寅以降之詞其間計辛卯夏也故引朔日辛卯之詩皆假借使之也劍去梧宮冷刀  
投桂水煎訓狐宵叫嘯嬰蜺晝連蜺鬬澗龍傷血崩崖蜃  
吐涎是夏虞山有出蜃之異拊心看迸裂彈指省轟闐攀附龍門迴  
追陪鶴蓋連園林規綠水屋宇帶紅泉一飯常留客千金  
不問田以忙消硯礪及夏領芳妍日落邀賓從丹移沸管

絃丹青搜白石杖屨撰松圓

君好藏白石翁畫于程丈孟陽有師資之敬

齒馬

成吾老童烏憶汝賢兔園溫句讀蛾子學丹鉛枕膝應傳

喜登樓獨許立青春憑驥裏白首託夔虵桃李西江宰梧

桐左掖員裂麻心膽赤恤緯鬢毛宣北寺偕書獄西曹互

橐籥朱游和藥切黃霸授經專銅馬神州沸金雞密網蠲

甘陵錄牒寢元祐黨碑鐫北闕驚傳火東郊狎控弦帝車

俄運轉天步久述邇

余與君以甲申三月初十日同日賜環邸報遂失傳

鰲足傾三

極龍胡斷八埏關山留北顧宗祏寄南遷江左朝廷小交

南節鉞偏風雲天路偪翼戴本支便宗澤迴鑾表劉崑勸

進箋嶺邊求日月規外別坤乾翼軫開營壁湘灘抵澗瀍

隻身支浩劫赤手捧虞淵插羽鉤庸蜀分茅餌益滇黃農

羅種落邕桂簇戈鋌青犢烏仍合紅巾燈並緣反王收魏



豹別將置梅鋗白象扶丹轂烏蠻曳綵旂廬兒宿衛直廡  
養徹侯駢畫詔行營裏除官御覽先兩宮湯藥使中禁洗  
兒錢一旅基將肇三分業未竣連雞憎蚌蛤啞虎玩腥膻  
畫地翔河鳥嬰城墜紙鳶執冰嘻狒狒投縋引蠕蠕履善  
窮江表庭芝殉海嘖誓書申決絕望拜告精虔目裂光如  
炬臂藏血化殷花縵務面改藤帽枕尸還青草迎飛旄黃  
茅擁過輜虛祠包箬飯峒祭卜筵簞故嶺虞山似桂林亦有虞山  
新愁桂嶺牽用張平子四愁桂林之語丹心石路折皓魄火雲鮮盡說  
南朝李何慚東海田鏐金身故在刻木首非隕列列羞祈  
死淹淹笑祝延葭灰陽解駁火井燄浮煙錯莫嘶泥馬分  
明叫杜鵑朔方唐故事綸邑夏前編率土誠延佇敷天忍  
棄捐雲旗翻畢口星矢直狼肩壁壘分行陣雷風合弭鞭

白山厓倒側黑水浪平填鶉尾南迴越旄頭北掃燕誓師  
三后所飲御五車邊改葬新班劍興尸故馬羈羽門頒綬  
綬麟閣列貂蟬畫壁雕戈動祠堂兕甲縣傳芭歌杳杳薦  
荔鼓齠齠宿列還箕尾其先人學憲公名字星祠配女嬭皆取象傳說星也  
其夫人先五陵齊翦棘雙廟並加籩督師侍郎張公同儕  
汲於桂  
孫以門蔭起家抗後死身餘幾先生腹尙便不成升屋哭  
罵不屈同日被害  
彌想對牀眠單子留形影淒涼度陌阡雞窗言髣髴蛛匣  
字蜿蜒西第花猶發東皋草欲芊經過光景眩識路夢魂  
顛太息看梁棟沉吟仰屋椽移山誰負畚蹈海可乘扁守  
器紆奔問餘皇肆泝沿祝予雙淚涸將伯寸心痛長夜歌  
將闕窮塵恨始湔蕩陰三士詠蜀國八公篇鄉夢憑溫序  
哀詞屬馬汧降神天意遠養士國恩綿汗竹新書史澆花

近掃阡明明老眼在拭目向空玄

放歌行贈櫟園道人游武夷

礪君吳剛斫月之玉斧揚君魯陽指日之戈父飲君邯鄲  
一曲之美酒贈君繞朝臨行之策書憶君去年歸畫繡高  
堂燕喜身垂魚雕軒列戟侯門屏金章玉軸照座隅詞人  
油素獻謌頌肩輿踵汗仍口呿青陽逼除才隔歲南冠顧  
影行次且秋風吹散孟嘗客廉公市門日吁虛老夫衝寒  
走問訊罨頭冰雪膠髭鬚溺人但一笑越吟多嘖嘖班荆  
過逢桑下語倉皇執手臨交衢且勿賦河梁且勿歌驪駒  
聽我放歌行請言造化初厥初空界二十劫毘嵐灑風吹  
復噓金藏興雲雨如軸金剛界結胎堪與清水升天澱濁  
地七金四洲高下殊光音天人福報薄地餅食竭林藤枯

身光彫落器界暗四輪墨穴游昏塗寶音諸地起慈愍化  
現日月天地星宮俱開張兩儀布二曜二十八宿磊落排  
空居梵王口臚臚輪各種族欲界障持善現相刳屠修羅  
蕩腳波海水生憎頭上蹴踏雙兔蜍手幃日輪口噉月日  
月怖匿天嗟吁此方蚩尤兄弟亦徒黨銅頭鐵額興螯弧  
共工觸頭折天柱后羿矯矢摧陽烏三王五伯迭整頓君  
臣將相羣拮据撐天柱地定八極爲此衣冠禮樂爭寰區  
東門嘯戎索北落移天樞裸衣笑神禹好冠詫勾吳退飛  
未許傍宋鶴避風何地追鷄鵠天地爲籠逝安適身藏藕  
孔難卷舒移眉下目吁可怪閉門捕舌誰能逋劾君以彈  
甘蕉之封事案君以覆鄭鹿之追胥誤君以知雀語之公  
冶貴君以辨牛鳴之葛廬淳于冠纓大笑絕舍人寢數尻

轡呼崑山抵鵲用良玉泉淚洒涕成明珠心驚蟻牀自急  
擣夢入鼠穴仍供趨斗間干將會須出山頭廷尉當何如  
河鼓大星正芒角橫海兵氣連無諸蛟門水立鳥不渡子  
陵灘頭斷釣漁老夫已辦干日醉吾子慎愛千金軀扁舟  
東下值元夕紅鐙綠酒停姑蘇皋橋銀箏裏紅淚遲君拂  
拭追歡娛元墓梅花眾香國西泠紅雨桃千株巾車蠟屐  
聊復爾何用轆轤催奔車武夷之君吾遠祖相見遙祝傳  
區區曾孫面皴頭髮禿何當念我詒乾魚酌君酒攬子袂  
我欲竟此曲此曲煩且紆隴嘲吟嚙如夢魘宮商失次無  
疾徐征馬爲躑躅僕御亦踟躕鳥啼鴉散君且發玉壺酒  
暝還須與放歌行還須與東方瞻顧已精色晨雞喔喔鳴  
前除

丁家水亭再別櫟園

鐙暈離筵酒不波同雲釀雪暗秦河人於患難心知少事  
值間關眉語多鼓角三更莊舄淚殘棋半局魯陽戈荔支  
醢熟鱸魚美醉倚銀箏續放歌

左甯南畫像歌爲柳敬亭作

何人踞坐戎帳中甯南徹侯崑山公手指揮彈出獅象鼻  
息呼吸成虎熊帳前接席柳麻子海內說書妙無比長揖  
能令漢祖驚搖頭不道楚相死是時甯南大出師江湘千  
里連軍麾每當按甲休兵日更值椎牛饗士時夜營不諠  
角聲止高座張鐙拂筵几吹唇芒角生燭花掉舌波瀾沸  
江水甯南聞之鬚蝟張攸飛櫪馬俱騰驤誓剜心肝奉天  
子拚灑毫毛布戰場秦灰燒殘漢幟靡嗚呼甯南長已矣

時來將帥長頭角運去英雄喪首尾倚天劍老親身匣垂  
斃猶興晉陽甲數升赤血噴餘皇萬斛青蠅掩牆褰白衣  
殘客哭江天畫像提攜訴九泉舌端有鍰腸堪斷泣下無  
珠血可憐柳生柳生吾語爾欲報恩門仗牙齒憑將玉帳  
三年事編作金陀一家史此時笑嚙比傳奇他日應同汗  
竹垂從來百戰青燐血不博三條紅燭詞千載沉埋國史  
傳院本彈詞萬人羨盲翁負鼓趙家莊甯南重爲開生面  
題汴人趙澄臨趙子固棧道圖

蜀山崔嵬去天尺千峯萬嶂攢列戟奔濤坼峽鬪雷霆削  
鐵層層梯絕壁青天鳥道瞰窅冥終古蠶叢見開闢地縮  
千盤雲棧重天迴四游閣道窄牛車絡繹不斷頭飛走凌  
兢罕接翼輪鞅犖确如有聲人鳥夤緣共一跡穴穿重掩

身入雷登頓巉巖足上壁此圖瑰瑤畫者誰似爲昇平寫  
物色天漢津梁扼關隴沃野興圖跨梁益參旗橫拂東井  
深褰斜鉤連子午直叩竹蒟醬來東西慎熒冉馳走阡陌  
何煩力士挽金牛是處戎王貢瑤碧邨筒好酒車郊載織  
成錦段馬薦席烝徒猶拜古帝魂學士能銘劍閣石嗚呼  
此圖不易得全盛方興眞可惜丹青如閬華陽志衣裳不  
爲左擔易何物羶車掣橐駝況乃窮廬蓋服匿卧龍躍馬  
定誰是錦江玉壘還自昔雪江老人頭雪白吮筆經營口  
噉啗畫師有心人不識老夫看畫長歎息

贈侯商邱若孩

殘鐙顧影見蹉跎十五年來小劫過會捧赤符迴日月遂  
刑白馬誓山河閭門菜圃英雄少朝日瓜疇賓客多挂壁



龍淵慙繡澁爲君斫地一哀歌

蒼梧雲氣尙蕭森八桂風霜散羽林射石草中猶虎伏  
金壁外有龍吟夢迴芒角生河鼓醉後旌旗拂井參  
夷門尋舊隱要離千載亦同心

橘社傳書近卜隣龍宮破陣樂章新蒼梧野外三衣衲  
黃柳車中七尺身世事但堪圖鬼魅人間祇解植麒麟  
相逢未辦中山酒且買黃柑醉凍春

席間觀李素心孫七歲童子草書歌

杜陵九齡書大字李郎七齡筆陣強身長未及等身  
案負劍卻立短凳傍凝睇雙瞳翦秋水梯几拂拭神  
揚揚須臾筆下龍蛇出折釵倒薤紛旗槍拳如繭栗  
不盈握放筆直欲墮堵牆力如藍田射伏虎飲羽穿  
石激電光勢如衛公

夜行雨風鬢霧鬢不可當書罷安閑妥衫袖斂手拱揖歸  
輩行肩隨兄弟舒雁立懷鉛畫槩森琳琅荀氏八龍見其  
四一龍奮爪先開張當筵觀者皆老蒼捋鬚奮袂徒驚惶  
老夫頓足自激昂安得抱之貢玉堂君不見昔年李長沙  
天子加膝坐御牀

大觀太清樓二王法帖歌爲山陰張爾唯作

神霄天子恢皇綱重鐫閣帖煥寶章干戈久忘熙陵勦圖  
書欲壓淳化藏侍書著摹換鉤搨太師京識新褫裝太清  
危樓切霄漢乙夜御覽迴虹光大觀承平過星紀宣和版  
蕩垂靖康聲明文物歸松漠翰林子墨炎昆岡馳載唐碑  
失定武瓊裏周鼓殘岐陽冊府秘閣俱已矣長沙戲魚徒  
相望新絳燥筆改東庫亮字損本來樵塲二府拜賜傳掌

故三館審定看堵牆良常新銘不在世羽陵舊蠹餘幾行  
君從何處購此本右軍墨蹟兼小王續帖真成廿卷羨萬  
籤何似二本良墨華晶光出匣紙筆陣折抹生鋒芒晴窗  
臨摹挾飛動斐几展翫鋪雲肪裂紋木直非剝損穠痕銀  
錠誰低昂從今鑒定歸米薛不收慰問嗤梁唐但看鸞翺  
與鳳翥焉用冷金並硬黃嗚呼此本不易得摩挲使我神  
慘傷自從京闕睹戎馬又使館門淪滄桑人間西清燼禁  
苑天上東壁埋文昌囊駝交跡踐竹素牛馬潰汗沉縹緗  
甲衣狼藉剔釧錦礮車迸裂窮琳琅游家蘭亭填爨下褚  
摹褱帖擲道旁魯公孝經麻姑字兒童插標叫市坊卷軸  
遑惜三千富款書甯數丈二長白麻何處博青縹碧牋翻  
喜歸黃腸奇哉一本獨完好豈無六丁下取將展卷俄驚

標識改開奩先嗅古墨香印經無煩辨分翦破體仍與論  
偏旁何年瓦官閣鴟吻有客山陰搜屋梁玉躐金題閣惜  
重褚妍歐怪空輝煌已堪唐陵比玉匣重許漢室開珠囊  
傷心西昇失至寶褚河南西昇經余購得之新安乙酉城陷失去漫眼東觀欲發  
狂吾家圓印銘忠孝長依書史緘篋箱米元章書史云錢氏所收浩博帖上  
有希聖字印忠孝之家作歌無才繼石鼓閣筆再拜朝墨  
皇

金陵雜題絕句

澹粉輕煙佳麗名開天營建記都城而今也入煙花錄鐙  
火樊樓似汴京

頓老琵琶舊典型檀槽生澁響丁零南巡法曲無人問頭

白周郎掩淚聽

紹興周錫圭字禹錫好聽南院頓老琵琶曰此威武南巡所遺法曲也

舊曲新詩壓教坊縷衣垂白感湖湘閑閑集教孫女身

是前朝鄭妥娘

鄭如英小名妥娘詩載列朝閨集中今年七十二矣

### 吁嗟行走筆示張子石

君不見程孟陽詩名粉繪垂琳琅松圓一杯掩寂寞孫枝  
兩葉悲流亡又不見程善長布衣俠骨今無兩傭保雜作  
購童稚新安江頭命兩槳是時春寒雨飄蕭天容人意俱  
無慘通眉長爪猶在眼陳根絕哭不可澆練川故人望眼  
勞種泥扶病來崇朝摩頂執手心鬱陶日推脫粟身解袍  
喜心翻倒轉嗚咽迷離老淚隨風颺吁嗟乎丹陽朋舊不  
可得勝華通子誰省識白刃有客致伯禽青山無人弔李  
白老夫耄矣徒歎息天地兵塵尙偏塞桃花照眼淚霑臆  
且持邨酒勸子石一爲歌行歌主客

古詩贈新城王貽上

風輪持大地擊颺爲風謠吹萬壑邃古賡歌暢唐姚朱絃  
汜漢魏麗藻沿六朝有唐盛詞賦貞符彙元包百靈聽驅  
使萬象窮鏤雕千鐙咸一光異曲皆同調彼哉譏譏者穿  
穴紛科條初唐別中晚畫地成狴牢妙悟掠影響指注闕  
釐毫瓊天醯雞覆井月癡猿號化爲劣詩魔飛精入府焦  
窮老蔽蔀屋不得瞻汶寥正始日以遠詞苑雜莠苗獻吉  
才雄驚學杜餽醢糟中默俊逸人放言訾謝陶考辭競嘈  
噴懷響歸浮漂江河久壅決層濶亦騰囂玄絃取偏張苦  
調搜凋噍鳥空而鼠卽厥咎爲詩詆喪亂亦云膺詩病不  
可瘳叶譬彼膏肓疾傳染非一朝嗚呼杜與韓萬古垂斗  
杓北征南山詩泰華爭嵒巒流傳到於人不得免嘲況

乃唐後人嗤點誰能跳窮子抵尺壁凍人裂複陶熠燿點  
須彌可爲渠略標昌黎笑羣兒少陵訶汝曹嗟我老無力  
掩耳任叫喚王君起東海七葉光漢貂麒麟奮蹴踏萬馬  
暗不驕識字函雅故審樂辨簫韶落紙爲歌詩絳雲卷青  
霄自顧骨骼馬創殘卧東郊敢云老識路昏忘慙招邀河  
源出星海東流日滔滔誰蹠巨靈掌一手湮崩濤古學喪  
根幹流俗沸螭蝸僞體不別裁何以親風騷珠林旣深深  
玉河復迢迢方當翦榛楛未可榮蘭茝瓦釜正雷鳴君其  
信所操勿以獨角麟媿彼萬牛毛伊余久歸佛繙經守僧  
寮張觸爲此詩狂言放調刁無乃禪病發放筆自逸騷起  
挑長明鐙懺除坐寒宵

鐙樓行王寅元夕賦示施偉長

長安元夕風景妍夾路鐙樓柳市邊黃道日回春夜暝碧  
空月壓看場圓絡角星河挂人首九華蓮燄枝如藕側帽  
都簪內苑花薄醪猶帶昆明酒千金一刻買春陽十里珠  
簾曼睺光全疑月面爲人面不辨衣香與坐香當時我亦  
銅龍客朝回衝酒城東陌銀燭遙連北里紅金壺不許東  
方白如今老大鬢婆娑土室龕鐙禮佛陀上元儋耳歡娛  
少鐙火樊樓涕淚多憐君旅食山城下鐘罷鑪殘守僧舍  
膠牙生菜粥不糜蜇鼻村酤酒未竿與君相去一牛鳴便  
似蓬池話淺清挑鐙互見闌珊影倚戶如聞嘆惜聲月宮  
清輦空相憶金牀舍利無消息綺陌兵殘玉露晞紫姑卜  
罷銀河仄寂寂秋衾卧冷雲輭紅香霧想氤氲夢迴歷歷  
華胥國折腳鐙邊說向君



病榻消寒雜詠

直木風來自古憂，不材何意縱尋矛。  
羣蟬枉撼盆池樹，積羽空沉芥子舟。  
說易累伸箕子難，編書頻訪大航頭。  
白頭炳燭渾無暇，魯酒吳羹一笑休。

中年招隱共丹黃，枯朽猶餘翰墨香。  
晝裏夜山秋水閣，鏡中春瀑耦耕堂。  
客來蕩槳尋閒詠，僧到支筇話夕陽。  
留卻中州青簡恨，堯年鶴語正悲涼。

推蓬剪燭夢悠悠，舊雨依稀記昔游。  
南國梟盧誰劇孟，北平雞酒有田疇。  
霜前啼鳥皆朱噉，月下飛烏盡白頭。  
病樹枝顛天一握，爲君吹笛上高樓。

廣陵人傳  
研詳北訊

高枕匡牀白日眠，閒看世態轉頽然。  
湛河不信多爲石，賣鬼還愁少得錢。  
鑿空舊能雕渾沌，舞文新擬案丁零。  
睡餘

偶憶柴桑集畫扇蕭疏仰昔賢

晚晴移詩匯卷十九終